

Кондак 1

Взбранной Воеводе Божией Матери и Небесной нашей покровительнице; вси в борьбе со страстьми, похотьми и соблазнами житейскими изнемогающыя, во уныние и отчаяние пришедшыя и плоды благодати Святаго Духа чрезмерною печалию изсушившыя, но внезапно Царицею Небесною укрепленныя, радостно взывают:

Радуйся, Премилосердная Богородице Дево, едина надеждо отчаянных, в борьбе со страстьми изнемогающих.

Икос 1

Ангели удивляются, Богородице Дево, Твоей неутомимой помощи грешным людям, жаждущим спасения, но от борьбы со страстьми, похотьми и соблазнами изнемогающим, с великою любовью ангельским языком славословят Тя, Пренепорочная:

Радуйся, святых ангелов служити грешным людям посылающая;

Радуйся, Сама многожды чад Твоих немощных укрепляющая.

Радуйся, уныние от печальных сердец отгоняющая;

Радуйся, ленивых и нерадивых подвизатися ради Царствия Небеснаго заставляющая.

Радуйся, закоснелым в лени и в нерадении мучитися совестию допускающая;

Радуйся, во отчаяние пришедших, но Бога не разлюбивших, от окончательной гибели спасающая.

Радуйся, полчища бесовския, на них нападающия, вмиг разгоняющая;

Радуйся, яко Тобою и грешныя людие исправляются.

Радуйся, Премилосердная Богородице Дево, едина надеждо отчаянных, в борьбе со страстьми изнемогающих.

Кондак 2

Видяще Пречистею Деву, таковую велию милость ко грешником проявляющую, и всех любящих Ея, на правом пути спасения укрепляющую, очнемся, братие, от непомерней печали и воззовем к Ней: помози нам, Царице Небесная, примири нас с Сыном Своим, укрепи нашу волю к добродетельной богоугодной жизни, да прогнав от себя лень и нерадение, воззовем к Богу: Аллилуиа.

Икос 2

Тма греховная окружила нас и разум наш омрачается, яко своею лению и нерадением впади мы в забвение и окамененное нечувствие, темже яко рабов своих понуждают ны демони работати греху, понеже волею своею вдалися мы в руке их и сдружилися с обществом сатанинским, но аще и не считаем себя причастными ему, обаче и добрых дел не творим: обеты, данныя Богу, не исполняем, в расслабление греховное впадше, но, надеяся на заступление Твое и на помощь благоутробия Твоего, взываем Ти сице:

Радуйся, всем любящим Триипостасного Бога, скорая попечительнице;

Радуйся, в борьбе со страстьми изнемогающим скорая

помощнице.

Радуйся, многоглаголивых и пустословных молчати и Бога бояться научающая;

Радуйся, ленивых и сонливых к бодрствованию воздвизающая.

Радуйся, омраченныя суетою и нерадением чрез печаль сердечную вразумляющая;

Радуйся, не любити мира и вся, яже в мире, наставляющая.

Радуйся, прежде любити ближняго своего научающая;

Радуйся, от любве к ближнему к любве Божией их приводящая.

Радуйся, Премилосердная Богородице Дево, едина надеждо отчаянных, в борьбе со страстьми изнемогающих.

Кондак 3

Грех овладел нами, в броню нечувствия заключил сердца наша: не имамы стыда, ни покаяния, ни слез, ни страха Божия. Помрачилися грехом духовныя очи наша и не ведем, что творим: доброе или злое, утопая в бездне греховней. Но Твоими, Владычице, молитвами возбужденная совесть наша и обличает нас, и научает не имети надежды на своя немощныя силы, но в несумненной надежде на Твое всеильное заступление пред Богом вопияти Ему: Аллилуиа.

Икос 3

Имуще Тебе, Великую Ходатаицу за род христианстей пред возлюбленным Сыном Твоим и Богом нашим, молящую Его да не погубит за грехи наша всех, в плен бесовом впадших, но возвратит жаждущия спасения к добродетельней жизни, да укрепит их в борьбе со страстьми, похотьми и соблазнами житейскими, и мы грешныя дерзаем вознести глас к Тебе, Неискусомужная:

Радуйся, Благодатная, день и ночь за ны, грешныя, Сына Своего умоляющая;

Радуйся, яко и нас Ему молитися научающая.

Радуйся, творити волю Божию нам помогающая;

Радуйся, славити Бога нас вразумляющая.

Радуйся, служити ближним, яко чадам Божиим, нам повелевающая;

Радуйся, чрез любовь к ближнему любить Бога нас научающая.

Радуйся, память о ближнем с памятью Божией в нас соединяющая;

Радуйся, усердная хранительнице иноков в борьбе с блудной страстию им помогающая.

Радуйся, Премилосердная Богородице Дево, едина надеждо отчаянных, в борьбе со страстьми изнемогающих.

Кондак 4

Буря суетных помышлений и дел омрачает наш ум, яко не видети нам, ниже чувствовати грехов своих, обвиняем бо ближняго своего в скорбех наших и печалех; обаче имуще надежду на Тя, и мы, побежденныя различными страстьми и похотьми,

плененных бесовскими наваждениями и страхованиями, охладевших к молитве и доброделанию, от всего сердца не престанем просить помощи Твоей, воспевая Богу: Аллилуиа.

Икос 4

Слышавше, яко Сын Твой преклоняется ко всякой мольбе Твоей за ны, грешныя, иже Ты, Всемилостивая, желаеши спасти, молим Тя: да укрепит Господь и нас по молитве Твоей паки творити волю Божию, а не волю бесовскую, да поможет нам приклонити волю свою искренне работати Триипостасному Богу, да Тебе с любовью зовем:

Радуйся, наша истинная ходатаице и заступнице;

Радуйся, яко Сын Твой Тебя ради нас милует.

Радуйся, яко без Тебе никтоже может спастися;

Радуйся, яко Ты еси единая лестнице от земли на небо.

Радуйся, яко Ты еси единая наша верная и надежная путеводительнице в Царство Небесное;

Радуйся, яко чрез Тебе падшия людие возвращаются в рай.

Радуйся, рождающая нам Спасителя душ наших;

Радуйся, укрепляющая нас в напастех от враг видимых и невидимых.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 5

Своим целомудрием и смиренномудрием, Пречистая, превзошедши вся земнородныя, удостоилася еси дати Свою пречистую кровь на соткание плоти Сыну Божию, но аще и почитаема еси ангельскими чинами и сонмом святых Царицею Неба и земли, обаче не оставляеши и нас, грешных, но присно молиши возлюбленного Сына Твоего, да причислит ны Своему избранному стаду, и Сама неустанно помогаеши всем право верующим во Христа и поющим Ему: Аллилуиа.

Икос 5

Ведуще велию милость Божию к почитающим Его, даровавшего нам Тебе, Заступницу рода христианскаго, да ни един истинно верующий во Христа не погибнет, аще прибегнет к Тебе, Божией Матери, за помощью и утешением, со благодарением во умиленном сердце зовем Ти:

Радуйся, единое наше в скорбех утешение;

Радуйся, единое наше тайное вразумление.

Радуйся, ума нашего просвещение;

Радуйся, душ и телес наших исцеление.

Радуйся, наше с Богом примирение;

Радуйся, в Царство Небесное наше возведение.

Радуйся, мудрая украстельнице душ святых;

Радуйся, единая помощнице во благих начинаниях наших.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 6

Проповедницы истиннии явились святии апостоли, слышавше от Тебе, Богородительнице: «Аз есмь с вами до скончания века!» Не остави и нас, аще и просвещенных учением святых апостолов, обаче по множеству грехов во уныние и отчаяние впадших; помози нам, Владычице, уклонятися от всего злаго и богопротивнаго, яко не имамы сил отстати от своих греховных привычек, и всем сердцем, и всею волею служити Богу, не можем паки духовными очима възрети горе, но пораженныя безволием и унынием молим Тя о помощи, Всепетая, с жалобным стоном взывая к Богу: Аллилуиа.

Икос 6

Показала еси нам свет истинный – Христа Бога нашего, Пренепорочная Богородительнице, яко Ты еси небесныя врата, имиже на землю сниде Сын Божий, да Тобою возведется род христианский в Царствие Небесное. Мы же, надеяся на помощь Твою, молим Тя: не остави нас, волею разслабленных и беспомощных, утративших надежду на спасение; но помози нам и научи, Премилосердная, исправить греховное свое житие, дабы усердно благоугождая Богу, возмогли мы воспевати Тебе сицевая:

Радуйся, Пренепорочная, плотию Спаса и Бога нам рождающая;

Радуйся, Препрославленная, яко Сыном Твоим, Богочеловеком, грехи нам прощаются.

Радуйся, яко Твоим ходатайством людие покаянием на место ангелов падших возводятся;

Радуйся, яко любовь Твоею мы, мертвыя духом, оживотворяемся.

Радуйся, яко Тобою от сна греховнаго просыпаемся;

Радуйся, яко Тобою совесть наша очищается.

Радуйся, яко Тобою бодрость духовная в нас появляется;

Радуйся, яко Тобою ум наш просвещается.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 7

Вемы, яко Ты еси воистинну помощнице всем, усердно борющимся со страстями, похотьми и соблазнами, в смирении претерпевающим вся скорби житейския: лишения и притеснения от злых людей и бесов. Темже и мы, аще по немощи человечестей и впадаем во грехи, но надеяся на Твое заступление и помощь, Царице Небесная, усердно взываем Богу: Аллилуиа.

Икос 7

Новую показал еси нам милость Свою Творец явлением чудотворныя Твоея иконы, нареченныя «Едина Надеждо отчаянных». Мы же, грехми благодать потерявшыя, темже во уныние и отчаяние пришедшыя, видяще яко с верою приходящыя к ней получают помощь и скорое исцеление, воспеваем Ти сицевая:

Радуйся, благая Целительнице болезней душевных и

телесных;

Радуйся, во всех скорбных обстояниях наше истинное увеселение.

Радуйся, яко Тобою ожесточенныя и озлобленныя сердцем смягчаются;

Радуйся, яко Тобою ненавистницы любовь обогачаются.

Радуйся, яко Тобою нетерпеливыя терпети научаются;

Радуйся, яко Тобою завистливыя доброжелательными бывают.

Радуйся, яко Тобою сребролюбцы нестяжательными и щедродательными становятся;

Радуйся, яко тобою пияницы и табакокуры от гнусных страстей избавляются.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 8

Странное чудо явил еси нам Творец, даровавый Тебе, о Богомати, великую Помощницу всем, потерявшим надежду на исправление греховныя жизни. Мы же, поработившися злым своим обычаям, не имамы сил преискренне служить Богу и туком божественныя Его сладости духовно насыщаться, темже паче во уныние и отчаяние пришедше, со слезами припадаем к Тебе, Пренепорочная, да умолиши Сына Твоего за ны, вопиющия к Богу: Аллилуиа.

Икос 8

Вси заблуждшия в сей привременней жизни, соблазнами развращеннаго мира сего уловенныя и духовныя своя очи тем помрачившыя, не имущи в сем мори житейстем ни кормчего, ни учителя, не ведают, како устроить житие свое во еже спастися: кое правило исполняти, кое имети поведение, дабы Богу угодити и нечестивыя не раздражати до зела, да не яко дивии вепри нападут на ны и растерзают прежде времени, к Тебе, истинней Путеводительнице, в надежде на помощь прибегают, глаголя:

Радуйся, о быстротечности жизни сей нас помнить научающая;

Радуйся, просящым помощи Твоя, жизненный крест нести помогающая.

Радуйся, тленное богатство презрети вразумляющая;

Радуйся, нетленное сокровище на небеси приобретати повелевающая.

Радуйся, благодать душам нашим возвращающая;

Радуйся, возбудитися от сна нашей совести и помятование сохранить о Боге нам помогающая.

Радуйся, богоугодно молитися нас научающая;

Радуйся, непрестанно за ны молитвы к Богу возносящая.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 9

Всякое естество ангельское удивляется Твоему милосердию

ко грешному роду человеческому, погибающему в тине страстей, похотей и соблазнов, яко Ты, болезнуя о нас, не на небесех пребываеши в наслаждении духовных благ, но неустанно на земли труждаешися, спасая души наша, аще искаженныя грехом, но в надежде на милосердие Божие вопиющия Ему: Аллилуиа.

Икос 9

Ветия многовещанная не могут достойно глаголати о велией Твоей помощи всем, с верою к Тебе и Сыну Твоему прибегающим, в борьбе со своею плотию, соблазнами мира и духами злобы поднебесными изнемогающим, но надежду имущим на Тя и поющим Тебе сицевая:

Радуйся, свет людям во мраке греховнем возжигающая;
Радуйся, яко Тобою духовныма очима зрети горе научаемся.
Радуйся, премилосердная Мати всех сирот;
Радуйся, попечительнице вдовам честным.
Радуйся, наставнице богобоязненных пустынножителей;
Радуйся, благочестивых мирян вразумление.
Радуйся, на боголюбивыя с любовью взирающая;
Радуйся, нетленное богатство собирать им помогающая.
Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 10

Всех хочещи спасти, аще кто искренне желает спасения, но и оных, забывших Бога и похотьми плотскими уловленных, призываеши болезнями и скорбями к покаянию, сновидению и знамении их вразумляющи, да очнувшись от сна греховнаго в покаянии слезном воззовут к Богу своему: Аллилуиа.

Икос 10

Стена еси Ты, Богородице Дево, всем, хотящим спасения, за неюже безопасно сохраняемся от стрел врагов видимых и невидимых, сего ради на всяком месте и во всякое время сего краткаго жития нашего, с любовью чтуще Тя, от всея души воспеваем Тебе сицевая:

Радуйся, мир и спокойствие нам дарующая;
Радуйся, божественною радостью души наша напоющая.
Радуйся, долготерпению нас научающая;
Радуйся, благочестием сердца наша исполняющая.
Радуйся, милосердие в нас утверждающая;
Радуйся, веру в нас укрепляющая.
Радуйся, кротости нас научающая;
Радуйся, воздержание в нас утверждающая.
Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 11

Пение всякое земнородных не может достойно прославити Твое, Царице Небесная, милосердие к роду христианскому, яко

Ты, Всеблагая, не токмо жаждущым спасения, но и тем, кто потерял надежду на него, яко не в силах победити привычки своя греховныя, в великом томлении духа, унынии, отчаянии, омрачении ума, в ожесточении и окаменении сердечнем пребывающим, но Христа не отвергшимся, великое являеши вспоможение, со стоном сердечным взывающим к Тебе и Сыну Твоему: Аллилуиа.

Икос 11

Светоподательнице явилася еси Ты во тьме греховней блуждающим, да вси, иже из мрака греховнаго к свету выйти искренне желают, Тобою просвещеннии, возмогли бы неуклонно шествовати путем спасения, взирающе непрестанно духовныма очима горе и в радости поюще таковая:

Радуйся, яко тщеславным и гордым духовно ослепнути попускающая;

Радуйся, таковых временно ослепших верная хранительнице.

Радуйся, по испытании их вновь просвещающая;

Радуйся, искренним покаянием от тщеславия и гордости их избавляющая.

Радуйся, яко и смиренным ослепнути, да не возгордятся, попускающая;

Радуйся, хотящих зрячими быти по мере их смирения и подвигов исцеляющая.

Радуйся, ревность к подвигом в них распалаящая;

Радуйся, непрестанно молитися их научающая.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 12

Имаши власть от Бога вновь подавати нам благодать Сына Твоего, Владычице, юже мы в крещении получивше, утратили по множеству грехов своих, забывше обеты, нами Богу данныя, темже и ризу непорочности своя запятнав, нечувствием и омрачением одержимыя, токмо в Тебе, Всемиловитая, имамы неусыпную ходатаицу за род наш, заступающую всех, во отчаянии взывающих к Богу: Аллилуиа.

Икос 12

Поюще Чистейшую всех земнородных, Еяже смирение и непорочность соделали Ю достойным сосудом Духа Святаго и Материю Сына Божия, облеченную Пресвятою Троицею в славу Царицы неба и земли, мы, падшия и обремененныя грехми многими, не умея достойно восхвалити Тя, грешными устнами дерзаем воспевати Тебе сицевая:

Радуйся, кротосте, паче всякия кротости;

Радуйся, мудростию Своею всех мудрых превосходящая.

Радуйся, Игумения, всех ко спасению направляющая;

Радуйся, благоговейным пастырем стадо свое пасти помогающая.

Радуйся, духовным отцем грехопадения чад их, ко

исправлению тех, открывающая;

Радуйся, чадам молитвами отцев их духовных милость Свою дарующая.

Радуйся, духовных отцев своих почитати с благоговением повелевающая;

Радуйся, Сама истинная Наставнице неимущим на земли духовных отцев и матерей.

Радуйся, Премилосердная Богородице Дево, едина надеждо отчаянных, в борьбе со страстями изнемогающих.

Кондак 13

О, Премилосердная Богородице Дево! Пришедшим в безчувствие от лени, уныния и нерадения, всем отчаянным и надежду на исправление своей греховней жизни потерявшим, подаждь нечаянную радость духовную, и от окончательней погибели всех нас сохрани, наставляющи на путь спасения, да восчувствовав силу и крепость, Тобою Сыном Твоим нам дарованную, с радостью вопием всех благ Подателю Богу: Аллилуиа.

Этот кондак читается трижды, затем икос 1-й и кондак 1-й

Молитва ко Пресвятей Богородице пред иконою Ея «Едина Надеждо отчаянных»

О, Пречистая Владычице Богородице! К тебе, изнемогающие от уныния и расслабления, и своею совестью обличаемая, с сердцем сокрушенном припадаем и со умилением вопием Ти: не отступи от нас, многогрешных, зряще безчисленные грехопадения наша, имиже преогорчихом Триипостаснаго Бога и тебе, Царице Небесная. Избави нас, о Заступнице наша, от привычек греховных и плена страстей, имиже пленили враги волю нашу, связали ю крепкими путами, понуждая нас работати греху. Множицею преступили мы своим хотением заповеди Творца своего, темже и лишились за грехи наша благодати Сына Твоего, еуже защищает Бог любящих Его от сетей лукаваго. Не имамы, Владычице, сил разрешитися от вервия сего бесовскаго, изнемогла бо воля наша без благодати Сына Твоего и ведомы есмы аможе не хоцем, и якоже рабов своих понуждает ны враг работати ему. Не остави нас, Всемилостивая, без Твоея помощи, яко не имамы иныя надежды токмо Тебе, Пренепорочная. Аще не умолиши Сына Твоего помиловати ны, вси погибнем во гресех наших. Изведи нас от рабства сего греховнаго, буди нам свободительница и уз бесовских решительница, просвети ум наш, да память имамы, якоже вся, яже суть на земли, прах и пепел есть, наипаче брэнная плоть наша, ейже, яко идолу, понуждает ны служити враг. Пробуди, Владычице, к покаянию уснувшую совесть нашу, опали ю страхом предлежащего Страшнаго Судилища Божия, идеже ответ имамы дати о всех делех и словесех, и помышлениих наших. Разжжи души наша огнем ревности по Бозе, егоже в началех возжег в нас Бог. Мы же дар сей не соблюдохом и нерадением своим погубихом; ныне же, яко пять дев юродивых сидим во тме, не имущи что возжечи в сретение Жениха Христа. О, Матерь

Света, Царице Небесная, Надеждо отчаянных и обремененных грехми многими, ниспосли нам помощь от Сына Твоего и Бога нашего, умоли Сладчайшего Господа Иисуса Христа, да не прогневается на ны зело, но возведет ны от рабства греховнаго, да укрепит волю нашу благодатию Своею, яко избавльшися Твоим заступлением от сети вражия, прославим в Троице славимаго Бога, Отца и Сына и Святаго Духа во веки веков. Аминь.

Тропарь Пресвятой Богородице пред иконою Ея «Едина Надеждо отчаянных»

Тропарь, глас 4:

Похвало и покровительнице всему миру, Всеблагая Мати Христа Бога нашего, милосердием Его даровала еси нам икону Свою «Едина Надеждо отчаянных», Ты всегда с нами в радостех и печалех, исцеляеши от смертоносныя язвы скорбящих и унылых, яко Ты еси спасение людей православных, любовь Своею их покрываеши, Дево Пренепорочная.